

**Pembangunan Fizikal Harus Diseimbangkan Dengan Pembangunan Rohani - Yang di-Pertuan Agong Bernama
21 September , 2011**

KLANG, 21 Sept (Bernama) -- Yang di-Pertuan Agong Tuanku Mizan Zainal Abidin bertitah kesejahteraan yang dikecapi negara ini akan berterusan sekiranya pembangunan fizikal sentiasa diseimbangkan dengan pembangunan rohani.

Titah baginda walaupun pembangunan fizikal penting memandangkan ia satu keperluan untuk pencapaian ekonomi yang lebih baik, namun pembangunan rohani yang menzahirkan rakyat yang tahan uji, berdisiplin dan bermoral adalah juga sama penting.

" Justeru itu, rakyat sewajarnya mempunyai semangat jati diri tinggi bagi memantapkan lagi ekonomi negara," titah baginda pada majlis santapan DiRaja di Istana Alam Shah di sini, Rabu malam sempena lawatan rasmi tiga hari baginda ke Selangor.

Turut berangkat Raja Permaisuri Agong Tuanku Nur Zahirah dan Sultan Selangor Sultan Sharafuddin Idris Shah.

Turut hadir Perdana Menteri Datuk Seri Najib Tun Razak dan isteri, Datin Seri Rosmah Mansor, Timbalan Perdana Menteri Tan Sri Muhyiddin Yassin serta Menteri Besar Selangor Tan Sri Abdul Khalid Ibrahim.

Baginda bertitah bagi menjamin Malaysia dapat meneruskan agenda pembangunannya, rakyat perlu menjana perpaduan, keharmonian dan kestabilan ke tahap lebih baik.

"Jika tidak ada kestabilan dan keharmonian, kemudaratan akan dirasai oleh kita semua baik muda ataupun tua tanpa membezakan keturunan atau agama," titah baginda.

Yang di-Pertuan Agong bertitah pembangunan pesat di Selangor adalah hasil pembangunan yang dirancang dengan teliti dan teratur sejak negara mencapai kemerdekaan.

Pengalaman kerajaan Selangor, yang antara lain mengatasi kemiskinan di negeri itu harus diteladani negeri lain bagi mencapai kejayaan pesat, titah baginda.

---BERNAMA

Hakcipta© 2011 BERNAMA

Source: <http://www.bernama.com/bernama/v5/bm/newsgeneral.php?id=614974>